

rum titulo gaudebat, nunc septem civitatibus imperat, 1 Chingtien, 2 Kingxan, 3 Cienkiang, 4 Mienyang, 5 Kingling, 6 Kingmuen, 7 Tangyang. jacet urbs Han fluvio vicina ad ripam orientalem, montibus aquisque ceu munitissimo vallo undique circumcincta. Regionem habet rerum omnium ad usus humanos facientium feracem. Sex numerat heroibus dicata fana.

Montes. Kingmuen mons prope civitatem ejusdem cum ea nominis, hic fuit olim inter Borealiores Provincias Çu Regno pro fortissimo muro ac termino. Çucai mons prope Tangyang est trigessimus tertius ordine in libris Taulu, in eo arbores ac lapides omnes rubri sunt coloris, habetque rivum, qui dulcissimam ac odoriferam aquam volvit.

Flumina. Cienkiang præterfluit flumen ejusdem nominis.

Sinlo fons ob aquæ præstantiam hic recenseri meretur; est in monte Kingyuen.

Decimaquinta Urbs

C H I N G Y A N G.

Borealissima hujus Provinciæ Urbs Chingyang est, Xensi Provinciæ vicinissima, ex qua accedentes Han orientalis fluminis aquas prima excipit: hic fluvius hanc urbem ingenti gyro ac flexu ambit, deinde reliquas alluit hujus Provinciæ terras. Regit civitates septem, nimirum 1 Chingyang, 2 Fang, 3 Choxan, 4 Xancin, 5 Choki, 6 Chingfi, 7 Paokang.

Antiqua nomina.

Sub Yvo Imperatore præcedentis sortem ac locum nacta est. cum Çu Regum esset, Siekiye dicebatur, à copia stanni quæ semper hic reperta fuit, & etiamnum effoditur. inde etiam Hana familia Sie dixit, hoc est stannum, Tanga autem à soli agrorumque fertilitate Nanfung, quasi Australem fertilitatem dicas, hodiernum nomen à Taiminga familia est. Stirps quædam hic nascitur, quæ ut hederæ nostra in altum serpit, flores producit luteos & nonnihil albicantes, extremitates ramorum subtilissimæ sunt, velut fila serica: ajunt ramusculum nudæ carni alligatum somnum suavissimum conciliare, ideoque Munghoa dicitur, hoc est somni flos.

Montes.

Ad urbis Barrolybicum mons est Tienfin, cujus acclives colles veluti moenia planiciem centum stadiorum ambiunt: hunc locum medici plurimum frequentant, ut rariores hic herbas medicas colligant.

Prope Choxan est mons Çanglo, in quo scribunt rusticum quendam per annos aliquot collegisse castaneas, servasse in futurum, ad occurrendum fami, quam instare præviderat atque ita rusticis suis, ne fame perirent, fuisse auxilio.

Nuiqua mons ibidem est à muliere Nuiqua, quam loco idoli habent ac venerantur, nomen habet, cujus superbissimum ibi visitur templum: hanc tantæ virtutis fuisse perhibent, ut contractum coelum restaurarit, ferruminaritque, ut Mahometes Lunam scilicet.

Flumina. Lungmuen fluvius ad ortum urbis fluit, ubi originem etiam habet in monte ejusdem nominis. prope Choxan amnis est Cungyang, cujus aqua maculas omnes facile è vestibus eximit, & ad ferramenta exacuenda optima esse scribitur: quod nescio quid mordacitatis habere videatur. Ibidem est Xangyung amnis, in quo ingens una catadupa seu aquæ lapsus est, in quam si vel lapidem injeceris, continuo tonitrua ac pluvia ingruit.

Civitas prima major

C I N G C H E U.

Fortissimo atque optimo loco jacet hæc civitas, & sub se tres alias habet, quas regit nimirum 1 Cingcheu, 2 Hoeitung, 3 Tungtao, 4 Suining. Ejus confinia sunt Queicheu Provinciæ montes.

Montes. Si mons præruptus undique ac præceps, accessuque difficilis, in vertice tamen quandam habet planitiem.

Fçu mons altissimus ac ingens, inter hanc Provinciam & Queicheu terminus est, prope Tungtao incipit.

Flumina. Prope Hoeitung lacus est Cingpo intra quem ingentes scopuli sunt, ac lapides, quos combibones illi subinde ascendunt ac frequentant, ad sua inibi celebranda symposia: ibidem rivus est Hiung à novem efformatus torrentibus Lang nimirum, Vu, Hiung, Xin, Lung, Sui, Quei, Vu & Hiung.

Secunda Civitas

C H I N C H E V.

Quantung Provinciæ adjacet inter duos amnes Chincheu civitas, cujus Regio montibus quidem, non tamen incultis referta est: ipsa civitas magna frequens